

嘉慶新修江寧府志

新修江寧府志卷之三十七

人物四

忠義

晉王諒字幼成丹陽人少有幹略遷武昌太守初新昌太守梁碩專威諒謀誅碩弗克諒敗碩逼諒奪其節諒執不與遂斷諒右臂諒正色曰死且不畏臂斷何有憤患而卒事詳晉書本傳

樂道融丹陽人爲王敦參軍敦將圖逆謀害朝賢以告甘卓卓以爲不可道融雖爲敦佐忿其逆節因說卓討敦卓不從道融晝夜涕淚憂憤而死事詳晉書本傳宋張約之棠邑人耿介不阿授吉陽令景平元年朝議

廢廬陵王約之疏諫不納遂見殺

齊顏見遠晉侍中含六世孫爲齊御史治書梁武受禪見遠痛哭而死

唐劉鄴字漢藩句容人父三復以文章知名李德裕觀察浙江辟爲掌書記使鄴與其子共師學咸通初擢左拾遺召爲翰林學士歷中書舍人傷德裕以朋黨抱誣竄死海上書訟其冤復官爵後爲左僕射黃巢亂僖宗西狩追乘輿不及爲賊捕急不肯屈遂見殺事詳新唐書本傳

宋秦傳序江寧人淳化中充夔峽巡檢使李順之亂賊

攻夔州督兵拒戰城中乏食力不能支乃爲蠟書報上
赴火死其子奭遡峽求父尸溺死時以爲父死忠子死
孝奏至太宗嗟惻久之錄其次子煦爲殿直以錢十萬
賜其家事詳宋史本傳

朱處溧水人政和八年進士建炎二年官左從事郎潭
州瀏陽令四年軍賊杜彥等陷瀏陽處力戰三日死之
陳遘金陵人登進士第爲治有績蔡京惡之欽宗時位
光祿大夫徙中山金人再至遘冒圍入守城陷殉難死
事詳宋史本傳

劉綰高淳人累官安撫使靖康初死金人之難其後曰

應炎者任臺諫因不附賈似道被謫歸隱不仕云

秦鉅字子野江寧人丞相檜曾孫嘉定間通判蘄州金人犯境與郡守李誠之協力捍禦城破各以自隨之兵巷戰死傷略盡鉅歸署疾呼吏人劉廸令火諸倉庫乃赴一室自焚老卒冒火挽出之鉅叱曰我爲國死汝輩可自求生掣衣就焚而死二子浚渾皆從父死後封鉅義烈侯子贈通直郎立廟蘄州事詳宋史本傳

趙時暉六合人宋宗室子端平三年蒙古攻六合總轄李江降時暉死之

江萬里字子遠句容人僑居饒陽寶祐四年進士歷官

丞相殉國難子孫奉其衣冠歸句曲建祠崙山贈太師

益國諡文忠

按史貽直江公祠記知萬里原籍句容其子孫奉其衣冠歸葬句曲崙山建祀以祀

因此說史傳未載是以表之

汪立信其先建康人也淳祐六年進士咸淳十年元兵南犯賈似道督軍江上以立信爲江淮招討使就建康募兵受詔卽上道似道師潰守臣皆遁立信歎曰吾今日猶獲死於宋土也悲憤而卒至元丁丑歸葬溧水都堂山

元趙龍澤溧水人父鑑江西行省都事封句容縣男龍澤雷州清道寨巡檢侍養不仕會汝穎兵起攻陷建康

龍澤不屈死之子權亦從父死弟雷澤之次子楷家居亦遇害唯雷澤與長子棟及弟宗澤得免

明孫炎字伯融句容人博學雄辨太祖下集慶召見炎首勸收攬俊傑克處州以炎爲總制招劉基不至炎貽書數千言始來見送之建康處州故賊衝苗軍作亂脅降炎炎不屈賊饋酒炙炎大罵賊怒叱使解衣炎曰此紫綺裘吾君所賜當服以死遂見害後追封丹陽縣男事詳明史本傳

鄒銘六合人洪武間以虎賁左衛百戶從征雲南死於陣事聞以其子政爲貴州烏撒衛副千戶

沈旺六合人洪武間湖廣武昌護衛百戶從征荊門州死於陣其從承襲亦陣傷同邑中又有龍再一許福一皆以從軍死於陣

馮佚其名六合人明初巨族食指數千重門邃壁十餘里燕兵南犯將至境馮氏積水決渠邊燕將士築城堡結義兵數百以禦之燕師却走乃由天長至揚州渡江而破金陵王旣稱帝籍沒馮氏之家夷其族事載竹鎮紀略

齊泰溧水人洪武中進士累官兵部尙書受顧命輔皇太孫時諸王皆尊屬擁兵專制地嫌勢逼泰請宣詔諸

王臨邸母奔喪吏民悉聽朝廷節制諸王不悅謂齊尙書問我也後靖難兵至泰被執不屈死叔氏曰陽彥曰襄城曰大愷曰時永從弟曰敬曰宗曰宰七人俱賜死
事詳明史本傳

甘霖字沛之高淳人洪武初寄籍懷寧登丁卯賢書任御史以剛直廢又薦起太祖奇其貌曰浙中大旱汝往霖之授左參政以六月抵任率僚屬祈禱大雨隨至歡聲溢四境尋以病乞歸靖難師至錄用舊臣擢霖江西布政使不就被逮至京不可屈從容求戮死

陳太初字祐一高淳人建文壬午經魁靖難兵入不食

死妻唐氏投繯以殉

楊璟六合人建文壬午以陝西漢中衛百戶死於王事
後以子洪貴累贈後府都督昌平侯

韋敬六合人以福建漳州衛副千戶死於陣

張益字士謙江寧人永樂乙未進士正統時遷侍讀學
士知制詔詞翰敏贍時稱文豪從征歿於土木之難贈
翰林學士謚曰文僖附明史曹鼐傳

王一居上元人擢太常贊禮郎宣德初舉南郊禮儀度
醇雅特遷少卿正統時死土木之難

夏斌包真俱六合人正統十四年俱以錦衣衛校尉隨

駕北征戰死於鵲兒嶺

湯永勣字公讓東甌王和之孫少負才爲應天諸生與府尹不合攘臂去題詩學門有從今袖卻經綸手且向江頭理釣絲之句周文襄忱奇其才疏薦之于忠肅試以古今將略應對明敏忠肅曰此文武材也後以叅將力戰孤山堡衆寡不敵死之

黃宏字德裕六合人宏治壬戌進士由萬安知縣歷江西叅議九江盜起宏平之宸濠叛一時迫脅者多得釋宏不從以手械倚柱蹙項死暴屍數日濠誅贈太常少卿祀旌忠祠

武暉字元晦溧水人嘉靖間由臺史授台州府知事監司林應箕廉其能俾攝仙居黃巖皆稱治會倭犯境暉率兵擊却之越五日倭突至城陷暉馳報監司不之譴益加慰勞暉感激自誓往禦倭於拘嶺以奇兵掩殺之倭亦以奇兵還擊衆潰暉殿手刃數十人而援不至遂沒於陣奏聞贈太僕寺丞蔭一子

陳山王速宗仁張憑李秀季寶許金郭能呂洪姚訓崔甫陳甫嚴在盛遷周浦沈坤崔貫孫寶黃庚十九人俱六合民兵嘉靖三十二年倭犯境戰於八團山速仁憑皆殺傷數賊死於陣三十四年大戰秀及寶等十人死

舟戰於劉家河坤等同溺死當事上其功命設厲壇爲位祭之

李佛保溧水有力人也忠義自許嘉靖間倭犯溧衆惶潰保獨挺身力戰死於募軍橋同時邑中丁遵亦以禦倭戰死

王二把勢六合人膂力技藝冠絕流輩邑令董邦政所養士也嘉靖時倭內寇董督民兵禦之王爲先鋒數奏奇績後倭大至王揮刀戰衆寡不敵沒於水

童仲揆字元圃上元人萬歷戊戌武進士猿臂善射有古名將風爲四川都司經畧熊廷弼聞其名疏調軍前

賜諡烈愍

屢立戰功天啟元年率師渡渾河赴援衆寡不敵仲揆揮短兵接戰中弩死贈都督廕其子以振後歷官叅將亦死於陣事詳明史本傳乾隆四十一年

張可大字觀甫應天人萬歷辛丑進士由守備歷舟山參將城久圯命築之海潮害稼築碕蓄淡水田遂爲膏腴莊烈初命爲登萊總兵官平島帥劉興治之亂內陞左軍都督聞變回登州爲戰守計城陷以佩劔付部將盡斬諸婢妾投繯死諡莊節事詳明史本傳

姚九疇字庚先

縣志作
康元

江寧人爲浦口守禦崇正八年

賜九疇諡節愍

冬從遊擊汪之斌援江浦與賊戰連敗之城賴以全之
斌欲搜山九疇阻之不聽中賊伏九疇率所部往救出
斌於重圍賊麋至援絕矢窮誘降不屈罵賊死同時有
姚國輔姚士良皆死於陣與九疇稱三姚云乾隆丙申
梁志仁字霏玉江寧人由鄉貢授衡陽令立易徵便民
之法改羅田縣流寇羅汝才犯境以志仁長者不忍加
兵會邑姦導其別校入城志仁巷戰手刃數賊被執大
罵賊碎支體而焚之妻唐氏亦被殺汝才馳至以擅害
志仁誅其別校以禮歛之事聞贈蘄州知州乾隆丙申

賜諡烈愍

庠生熊國璽江浦人崇正乙亥除夕流賊逼城下國璽率士民守埤會賊登城奮力格鬪冒刃死諡忠烈

武生楊五雲江浦人流寇破和五雲日夜練民兵寇至禦之無不以一當百城賴以完久戰乏援卒爲賊害

談王道字對揚六合人以鄉貢授當塗訓導移新鄭歲大祲爲粥糜命其長子躬哺之存活甚衆崇正十四年鄰邑俱陷孤壘無援知縣劉之暉病王道協民城守不避矢石環攻不下賊以大砲攻之城應聲碎猶踞守東城連被數矢墮賊索縣印詈曰此朝廷家物賊欲何爲

賊怒併其子殺之

劉旋字遞生江寧人崇正戊辰恩選授四川崇寧令崇正十年流賊張獻忠寇蜀州縣望風遁旋誓死守城陷被執厲聲大罵賊怒剜目剔腎而死乾隆丙申

賜諡節愍

潘可大金陵人崇正乙亥授安慶叅將偕道臣史可法堵賊於桐潯十年賊犯太湖可大與總兵程龍禦賊鄆家店多所殺傷會天雨師不得出力戰月餘矢盡糧絕戰死乾隆丙申

賜諡忠烈

賜謚節愍

葛元素句容人崇正元年恩選第一授山東賓州州判
陞本州霑光令流賊寇境城陷元素抗節不屈
陳虞孕昆明籍上元人仕濟南府同知崇正十一年濟
南南破虞孕死之乾隆丙申

蘇岫梅江浦人有勇略流寇橫行岫梅爲賊邀去飲之
酒說云善歌攜壺引滿作侑酒狀卽以壺擊賊立斃羣
賊怒爭欲殺岫梅岫梅奪刃自刎死

彭武伯楊崇猷六合人楊信之後襲爵崇正甲申闖賊
陷京城自縊死乾隆丙申

賜諡節愍

徐有聲字聞復上元人崇正辛巳廷試上奇其對擢戶部貴州司主事居官廉勤死聞難

汪偉字叔度上元人崇正戊辰進士授慈谿令多異政戊寅擢檢討荆襄失守上江防綢繆疏千餘言帝嘉之甲申保定游擊謝加福殺巡撫徐標迎賊偉聞泣曰事至此乎賊薄都城守兵乏餉不得食偉市餅餌以饋而已城陷偉繼室耿氏簡新製衲衣上下縫固以待偉援筆題襟曰翰林院檢討汪偉繼室耿氏同死節次早城陷投繯死謚文烈後賊遁縱火偉寓被焚內姪吳的哥

懼不可保自縊柩旁須臾火滅兩棺得全

本朝賜諡文毅事詳明史本傳

胥自修字二如江寧人萬歷壬子舉人令曲陽治爲三
輔最丁艱服闋補宜黃令以捕姦忤當事左遷衢州府
檢校轉光祿監事未赴聞京都陷具衣冠肅拜絕粒死
吳可箕上元國子生甲申聞變可箕具酒食召親友言
別莫解其意已乃製白衣題詩於襟入英靈坊關廟闔
殿扉自縊死同時有孝陵衛董啟明者自縊樹下妻王
氏與子女俱死武舉黃士彩亦題門自經死

馬純仁字公樸六合縣庠生流寇猖獗殄滅無時誓與

友人以身殉國甲申聞變投滁河卒

都司張良佐上元人宏光時與都司王廷佐守備劉統從左懋第出使

本朝俱以執節不降死乾隆丙申

賜諡節愍

張良佐王廷佐劉統俱上元人

毛至潔六合人侍父疾割股療之既終喪往浙西從黃公石齋講學公赴閩至潔還里崇正壬午貢成均授縣尉聞黃公遣使辭不就職竟往粵西省黃公於戍所宏光立黃公被召至金陵至潔朝夕追隨尋從黃公入閩薦授廣信通判參幕府黃公進至婺源師大敗被執至

潔與同門賴雍蔡紹謹趙士超俱械至金陵黃公殉節
四人皆死之

賜諡烈愍

楊光弼字次公上元人庚辰科武進士爲三江營都司
隸史可法麾下乙酉春總兵賀某知國勢難支固邀光
弼去辭曰事閤部十二年一旦去之安知異日不去大
將軍乎賀曰真義士也後總督徽嚴衢等處駐師江郎
丙戌秋偕族叔副將賓王從弟遊擊光宙同盡節死
劉鳳池溧水人乙酉兵至作遺言付子六斤從容赴水
死家人跡至見衣冠整飭立河中面如生

芮珂高淳人由武舉任六安州守備兵至城破殉難死
許士楷句容人讀書不成然不與流俗伍聞鼎革七日
不食死

邢仕囑字帶甫高淳廩生爲南康縣主簿鼎革時兵至
城陷死之子振慈抱父屍慟哭亦死

唐自綵達州籍江寧人宏光時爲臨安令杭州破自綵
逃山中有言受魯王敕者捕獲不屈死從子階豫同死
難乾隆丙申

賜諡忠節

李信字吾斯句容貢生選廣東和平縣令兵至境圍城

兩月力不能支招二子至營俱死一老諸生楊姓者在署中曰吾亦江右文學也忍獨生乎亦死

劉世勳上元人守安洋城力戰死乾隆丙申

賜諡烈愍

按世勳魯王時將

張名揚江寧人定西侯名振之弟魯王時左都督舟山被兄弟同自焚死乾隆丙申

賜諡烈愍

焦潤生上元人桂王時蒞曲靖府知府流寇孫可望犯境與御史羅國獻同被執不屈死事詳明史忠義傳乾隆丙申

賜諡節愍

陳六奇字鳴驚上元人萬歷戊午舉人授南寧令雲南大亂曲靖爲土酋所據知府焦潤生旣死六奇被執不屈闔門遇難乾隆丙申

賜諡節愍

朱家梁江寧人寧州知州按滇省志沙定州之亂家梁罵賊而死乾隆丙申

賜諡節愍

李開光陳萬策俱江寧舉人寇難殉節

黃金璽江寧舉人宏光時殉節

國朝劉斌字太修上元人順治戊戌武進士授湖北鄖陽
守備調竹谿值吳逆亂矢志不屈乞師進勦時賊攻寨
急妻周氏固守脫簪珥易糧兵感奮憑高發擣石七戰
傷賊千餘

詔加副將兵力戰死子銓性孝貧無嗣

王仁錫上元人順治乙酉拔貢授寧國府太平縣知縣
吳耿二逆餘黨兵至攻陷其城仁錫被縛不屈與親屬
七人皆殉難入祀昭忠祠後裔世襲恩騎尉

徐一范高淳人崇正戊辰進士順治初爲河南巡按蒞
大同左衛道順治八年以兵譁難作陣亡乾隆三十年

奉部行查置主入昭忠祠後裔世襲恩騎尉

劉虔溧水人庠生順治二年冬土賊乘城據樓櫓焚縣署庫虔糾衆力戰而死入祀昭忠祠蔭一子嘉慶八年准襲恩騎尉世職

顧來鶴字和之上元人順治戊子武舉人歷仕都司僉事管陝西寧夏中衛守備吳藩煽亂來鶴召集鄉勇防守甚嚴賊勢漸張援兵不至城遂陷來鶴大罵不屈死之事聞贈遊擊將軍廕一子千總康熙二十三年

勅贈懷遠將軍入昭忠祠妻林氏爲淑人後裔世襲恩騎

尉

卜世儼字若思上元人康熙甲辰武進士任貴州鎮遠衛守禦吳三桂亂世儼從容殉節死事聞

贈都司僉書廕一子千戶康熙四十六年三月

聖祖仁皇帝南巡

特賜盡節邊疆匾額以旌之子歿無嫡嗣曾姪孫士恒承祀乾隆二年奉

特旨入祀昭忠祠春秋丁祭並祀

姜山上元人仙霞嶺叅將康熙十三年遭耿逆變被執不屈罵賊死妻孺氏子文玉媳田氏閤戶自縊事聞

贈浙江衢州府副總兵

梁壩江寧人明忠臣梁士仁姪也令仙遊耿逆亂被執不屈死之

李莊江浦人乾隆丁巳武進士任湖南撫標中軍叅將乾隆三十八年奉調進勦小金川由資哩南山梁黑夜進攻道途險仄失足墮崖死奉

旨照陣亡例減半卹賞加二級蔭一子衛千總

張瑛上元人嘉慶二年以從九職銜投効陝西軍營四月從鍾叅將勦賊於商州西牛槽銳志撲滅中矛陣亡奉

諭旨加等議卹給雲騎尉世職

哈國瓏江寧人由武舉授直隸營千總陞涼州鎮標右
營遊擊嘉慶五年冬剿賊於洵陽縣棗樹嶺臨陣戰死
給雲騎尉世襲

新修江寧府志卷之三十八

人物五 仕績

漢張磐字子石丹陽人爲交趾刺史以清白稱時荊州賊胡蘭餘黨南走蒼梧刺史度尙僞上言蒼梧賊入荊州界遂徵磐下廷尉會赦磐不肯出獄因自列曰磐爲尙所枉赦無所除乞傳尙詣廷尉面質廷尉以其狀上詔徵尙至辭窮受罪同郡陶謙字恭祖除舒令磐爲廬江太守初磐與謙父友意殊親之而謙恥爲之屈謙性剛直有大節在官清白後漢書有傳

杭徐字伯徐丹陽人少爲郡佐有膽智策略三府表徐

有將率之任特遷長沙太守擊桂陽賊胡蘭朱蓋等大破斬之事見後漢桓紀延熹八年注引謝承書

吳葛祚字元先句容人任衡陽太守郡有大槎橫水爲妖祚乃大具斧斤之屬將往伐之其夜居民聞江流聲竝有聲旦往視槎則移去下流數里駐於灣中自是行者無覆溺之患事詳法苑珠林

晉陶璜字世英丹陽秣陵人仕吳爲交州刺史平交趾董元等吳亡歸晉封宛陵侯勸弛珠禁晉滅州郡兵璜上言諫止之事詳晉書本傳

紀瞻字思遠丹陽秣陵人瞻才兼文武忠亮雅正以討

周馥華軼功封都鄉侯論討陳敏功封臨湘侯歷官領軍將軍加散騎常侍王敦之逆贍力疾護六軍事詳晉書本傳

薛兼字令長丹陽人清素有器宇甚勤王事拜安陽鄉侯累官丹陽太守領太子少傅事詳晉書本傳

甘卓字季思丹陽人討石冰預平周馥征杜弢屢立戰功歷官安南將軍梁州刺史假節督沔北諸軍鎮襄陽悉除估稅檄天下討王敦尋爲所害事見晉書本傳

張闔字敬緒丹陽人初補晉陵內史興陂溉田蘇峻之役與陶回共督襄陽義軍峻平封宜陽伯事詳晉書本

傳

陶回丹陽人蘇峻之役言於王導請出兵出守江口又收合義軍預平峻亂別破韓晃以功封康樂伯桓景倭事王導回力陳其姦累官領軍將軍加散騎常侍事詳晉書本傳四子汪陋隱無忌咸有幹用並見回傳

梁昌義之歷陽烏江人少有武幹從高祖出兵戰功最多魏寇鍾離城中衆纔三千人義之多方抗禦殺傷魏以萬計會援兵至城卒得全授都督北徐州掾淮諸軍事平北將軍北徐州刺史事詳梁書本傳

陶季直丹陽秣陵人齊武帝作相季直不能阿意出爲

北海太守尋遷建安太守政尙清靜事詳梁書止足傳
丁咸序秣陵人以儒學名授衡陽判官有政聲

南唐邊鎬金陵人破白雲洞賊預平建州復取鐔州又
佐元宗平湖南歷官武安軍節度使事詳陸游南唐書
周宗字君太秣陵人烈祖將迎讓皇宗諫止之以贊禪
功晉官樞密使奉法循理事詳馬令南唐書

宋陳承昭昇州人督治漕河都人利之從征太原承昭
獻計請壅汾水灌城會班師功不克就歷官右龍武軍
統軍事詳宋史本傳

孫繼鄴字元嗣金陵人上禦戎策十數事宜州陳進反

繼鄴破賊於象州樞密使曹利用欲用之鄴惡其權盛數以疾辭後官至涇原路都總管兼知渭州事詳宋史本傳

秦義字致堯江寧人累官東染院使知蘇州遷內園使知泉州歷財貨之任精勤練習事詳宋史本傳

邵亢字興宗丹陽人趙元昊之叛亢獻兵說十篇仁宗繼嗣未立亢屢疏言之張貴妃薨立園陵亢疏罷之夏人之亂朝議將謀西討亢以財力殫屈未宜用兵條上其事累官資政殿大學士事詳宋史本傳從父必字不疑累官寶文閣直學士權三司加龍圖閣學士居官震

厲風采時雄州種木道上契丹遣人夜伐去又數漁界河中必奉詔以理折契丹屈之事附亢傳

盧鑑字正臣金陵人武帝特授右侍禁知儀州州有制勝關李繼遷入寇將乘虛襲取之聲言由此大入有詔徙老弱於內地鑑上言此敵姦謀不敢奉詔賊亦不至事詳宋史本傳

張頡字仲舉金陵人徙鼎州官江陵推官歲饑頡條獻十事海南黎人請出兵自効頡奉命處其事使一介往呼之出補以牙校事詳宋史本傳

王綸字德言建康人以薦爲監察御史忤秦檜罷去高

宗二十九年出使金人事詳宋史本傳

張邵字才彥烏江人出使金人詞氣不屈十三年始南還以敷文閣待制提舉江州太平興國官知池州宋史有傳子孝曾亦以出使歿於金事見邵傳從子孝祥字安國居官政尚簡易庭無滯訟歷官中書舍人除直學院兼都督府叅贊軍事兼領建康畱守宋史有傳又孝伯亦邵從子登隆興元年第累遷叅知政事韓侂冑當國孝伯勸弛僞學禁復故相趙汝愚官一時賢人貶斥者賴以漸還

魏良臣字道弼溧水人母病刲股以進宣和三年登進

士第授丹徒尉詣闕伸陳東寃徽宗南巡上疏請還闕
不報尋調嚴州壽昌令遷吏部員外郎金人犯高郵良
臣奉使講和與之盟而退尋擢吏部侍郎金人敗盟良
臣復奉使兀朮營金人欲畫江爲界良臣反復持論卒
定議如初秦檜忌之出知池廬二州檜死召叅大政首
請出衣冠之囚歸蠻瘴之寃起淹抑斥姦回竟以資政
殿學士出知紹興復歷知宣州潭洪諸郡卒謚敏肅
秦梓字楚材江寧人少有材名登宣和間進士授太學
錄擢樞密院編修歷知台秀袁太平常湖六州除翰林
學士出知宣州民詣闕請畱再移湖州致仕歸弟檜當

國梓惡其所爲遂自江寧徙家溧陽

李可六合人咸淳間爲監察御史與御史陳過疏論賈似道黨朝論快之

元王均容字受甫任江陰令縣故多火葬及溺女之事均容至嚴禁之擢戶部郎出知廬州以疾歸

明周楨字文典江寧人官大理卿定律令尋出爲廣東叅政屬吏感動事詳明史本傳端木復初字以善溧水人性清白杭州飛糧事覺逮係百餘人詔復初往治誠僞立辨尋出爲湖廣叅政一年流亡畢集子孝文翰林待詔孝思翰林侍書先後使朝鮮並著清節語並附周

楨傳

馮榮烏江人洪武初以才辟知華亭縣時海濱盜起旣克榮爲言於統兵請罪渠魁而貸良民之脅從者免死數萬人

蕭叔裕溧水人洪武間由辟召爲夔州府經歷州瀕江多盜吏不能詰叔裕捕治其魁蜀盜屏蹟尋謝病歸居輔字相之句容人任四川重慶通判遷山東青州通判時邊事騷擾歲歉民饑輔賑恤有方民懷其德

戎簡句容儒士有智識高帝與諸將論用兵因諭之曰汝等非不善戰然臨事決機知或不足宜親近儒者意

蓋謂簡也

孔克仁句容人由行省都事進郎中嘗侍太祖數論天下形勢及前代興亡事太祖志圖中原克仁以積糧訓兵觀釁待時爲言語詳明史本傳

趙本字居仁溧水人洪武間以薦辟歷官左通政治水浙江本以文請於水神潮果不至三日而功成

徐輝祖中山王達長子洪武中嗣魏國公靖難兵起輝祖帥師禦戰斬其驍將李斌等十數人北師大懼文皇卽位輝祖不屈孫承宗守備南京兼領中公廉恤士有賢聲事並附明史徐達傳

陳明善句容人洪武初以明經薦知六安州山賊潘文友聚衆劫掠明善命子真率衆捕獲郡賴以安

笄僖笄志皆句容人僖從太祖起義封千戶子貴征交趾有功官金吾衛指揮世襲志從太祖將兵克婺州破鄧青封錦衣衛百戶子端復從成祖破大同克滄州平山東官濟陽衛指揮世襲

魏澤字彥思高淳練城人洪武中官刑部尙書建文時謫海寧尉時文皇逮方孝孺誅及族黨孝孺幼子德宗甫九歲澤力爲維護臺州秀才余學夔心知之一日迂澤於城隅澤乃密致孝孺文稿及德宗於學夔遂得免

金玉江浦人從靖難起兵有功又討平山西妖賊劉子進論前後功封惠安伯事附明史薛祿傳

曹義字宜之句容人永樂乙未進士累官吏部右侍郎黜陟賢否罔有不當己巳秋北兵犯京師奉勅提督官兵守備正陽門晝夜巡察防範嚴謹敵不敢近天順初晉官南吏部尙書致仕歸

金紳上元人潤之子景泰間進士性狷介嚴毅由庶吉士授刑科給事中歷官刑部右侍郎成化間奉命巡視江西災以便宜行事至則休力罷征裁冗減獄境賴以寧紳子麟壽亦知名

夏輯字良成高淳人任沙縣令忤劉瑾被黜瑾敗補瑞
安調曲江以疾歸

張彥彭溧水人永樂間歷官河南道御史清慎持憲成
祖賜金牌百面以褒之

楊勉江寧人永樂中舉進士授刑部主事治獄明恕特
陞本部右侍郎獄上勉畱心詳察具得幽隱尋坐事出
於外後官至廣東叅政

許英字士華高淳人永樂間進士任莆田知縣調官邑
邑有僧寺婦女入者輒不返英率衆至寺聚衆僧局一
室中盡搜得所匿婦女悉還其家遂積薪寺門併僧焚

之尋推陝西道御史

鄭自強江浦人洪武間以薦舉授浙江寧波衛經歷清介自持卒祀鄉賢祠

李時勉名懋以字行上元人徙安福任翰林侍讀條上時務十五事洪熙元年復上疏言事仁宗怒甚召對便殿不屈英宗北狩日夜悲慟上書請選將練兵事詳明史本傳

蔣用文句容人仁宗監國用文與黃淮蹇義同輔知無不言一日論殺囚數百人用文從容爲言可矜狀上悉宥之卒謚恭靖孫誼中成化二年進士授杭州推官擢

御史風紀肅然著有經緯文衡紀行錄石屋文鈔愍翁
新錄諸書

姜璿字子澄江寧人工書仁宗在東宮召寫金字經由
中書舍人出守廣南府璿開誠布公靡然向化晉按察
副使督學政

王麟上元人宣德間由儀徵教諭轉國子監學正歷官
四川山東按察司僉事督學政有政聲天順初進階奉
議大夫

丁璿上元人正統間征麓川璿督宣府大同軍儲尋言
用兵便宜麓川平以功召爲左副都御史所至有聲事

附明史李儀傳

張瑄字廷璽江浦人知吉安府時歲饑陳牒上官發廩振貸討平廣西江浙諸路賊累官南刑部尙書事詳明史本傳

張紳字仲書句容人正統間進士授行人陞雲南道御史清理屯田陞陝西僉事時有邊警治軍餉有功晉叅政

王興宗上元人任金華知縣以治行聞時方籍民爲軍興宗奏止之事附明史王家顯傳

倪岳字順咨上元人父謙奉使朝鮮丰采凜然終南京

禮部尙書諡文僖岳性敏捷累官吏部尙書於歲終每彙次四方災異勸帝勤講學開言路十數事疏論西北用兵之害事詳明史本傳岳弟阜字舜薰一字東岡官庶吉士岳卒阜請於朝護喪歸尋叅政山東地方多盜阜擒治首惡餘黨悉平歷官有清操

陳鋼字堅遠應天人任黔陽知縣邑多水患鋼採石贅隄千餘丈山崖官道徑窄行人多墮厓死鋼積薪燒山拓徑丈許事詳明史循吏傳子沂見後文苑傳

王徽字尙文應天人任南京刑科給事中疏陳四事末言宦官之害甚詳又劾中官牛至罪謫貴州普安通判

事詳明史本傳子韋見後文苑傳

翟瑄字廷瑞南太醫院籍與弟瑛並以孝友聞瑄舉天順甲申進士由奉化令擢御史晉僉都御史巡撫山西又晉左都御史尋陞刑部尙書數斷大獄多所平反雖徒杖以下必詳讞焉瑛丙戌進士官兵科給事中封事數十上於時政多所裨益累官太常寺正卿

龍夔江寧人官戶部員外郎性峭直有祠官附權貴乞免家徭役夔執不可

李旻字景陽江寧人累官雲南按察使僉事辨雪冤獄貪墨望風引去朝野重之

黃縉字明章六合人天順間任直隸邯鄲縣有鄰境官被誣監司委勘縉廉得其情風力大著陞湖廣黃州府通判

詹例字良弼六合人天順間授河南修武縣縣積有逋負例念其疲累特疏於朝遂獲蠲免後以不媚權要調福建永春縣

謝瑄字廷璧六合人任山東東昌府通判河決奉勅往治瑄竟底績陞江西吉安府同知歷湖廣寶慶府同知以疾致仕

朱銓字士選金陵人預修兩朝實錄性清介居官廉平

歷官翰林院侍書天順中進刑部侍郎改貴州右叅政致仕歸

凌錦字日章句容人隸忠武前衛北兵寇京師錦從副將軍戰於彰義門追奔至紫荆關以功授百戶景泰初破貴州苗進副千戶天順初進指揮同知謫戍涼州尋召復職遂以疾告歸

胡漢句容人天順間進士授陝西澄城縣教諭值賊寇犯邊分巡憲嚴某素黷賄迫漢署澄城令漢蒞任後一無所餽嚴遂誣以失悞邊儲罷職

楊洪字宗道六合人父璟戰死靈璧洪代李謙爲都督

僉事進都指揮使久居宣府御兵嚴肅屢敗也先兵爲一時邊將之冠事詳明史本傳

巫凱句容人歷官遼東都指揮使時中國人自塞外歸者有詔悉送京師凱上言令得自便嘗使造舟松花江凱力請罷其役旣而役復興中官阮堯民等多不法凱劾堯民下之吏事詳明史本傳

童軒字士昂南欽天監籍景泰間進士授南吏科給事中時貢翠毛魚魷諸物以萬計軒上疏諫止之奉命撫蜀寇軒親歷賊壘宣布威惠賊羅拜乞生乃悉遣散歸農以南京禮部尙書致仕卒贈太子少保賜祭葬

鄭禮字中夫江寧人任襄陽府通判以平寇功進大名府同知擢守南安郡郡苦水患禮欲發倉賑民監司以未上請難之禮曰待報而後發民皆委溝壑矣如以矯制罪守守無所恨卒行之孫濂字師周以孝友聞舉嘉靖間進士授山東道御史出爲湖廣按察使有清名紀廣句容人累官後軍都督府右都督鎮守萬全寇不敢犯邊民獲安堵

羅麟字仲祥江寧人以孝友聞舉景泰四年鄉薦歷官廣東叅議部有冤獄數歲不決麟至立雪之竟抵誣者罪麟性寬緩及臨政果斷無畱滯子與宏治辛酉舉人

輅正德戊辰進士出守南康郡郡瀕彭蠡輅至作巨堰以避風濤民居以安

陳達六合人世襲忠義衛指揮景泰初陞都指揮僉事尋晉官都督同知達爲人沈鷺有謀尙氣節天順初少保于謙受極刑達獨收其尸葬之

曹景字廷璋句容人景泰二年進士授御史嚴明有法陞福建僉事雲南副使致仕歸

黃肅字敬夫六合人成化戊戌進士由河南新鄭知縣陞工部都水司主事進刑部員外郎擢廣東按察司僉事平黃紹又平岑濬東塞蠻反肅從間道破其巢遂潰

以功進湖廣兵備副使致仕歸

丁鏞字鳳儀上元人成化己丑進士任南刑部主事歷
郎中守興化嘗斷疑獄人稱神君

王敞字漢英一字竹堂錦衣衛籍以孝友聞成化間會
試第三人授刑科給事中疏罷四川建昌礦夫出使朝
鮮陞兵部左侍郎寧夏悖叛敞易置諸將皆收其用以
功加宮保性和易略無崖岸而廉潔之操確不可易
魯昂字廷瞻江寧人性戇直舉成化二十三年進士授
兵科給事中時院判劉文泰誣奏太宰王恕昂獨上疏
摘其姦中官李廣奪民田下昂勘問昂悉以還民焉

梅純字一之一字損齋江寧人駙馬都尉殷曾孫成化辛丑進士授懷遠縣清介自守與當道不合遂上章乞歸補孝陵衛指揮正德初陞中都留守

袁文紀字邦振六合人成化間任浙江龍游縣性機敏廉介有爲豪右懾服子渠字介石任山東泗水縣飭吏胥除姦弊催科不擾民安其政陞陝西漢中府通判嘉靖二十一年入祀鄉賢祠

袁濟號訥菴溧水人官易州判俸入悉以造屋於野招民聚居以防盜賊行旅賴之

潘珩字重玉上元人官九江同知改南康歲饑捐賑全

活甚衆

吳彥華字汝和江寧人成化辛丑進士由戶部郎出守
荊州州故有水患民多流移彥華至築隄二十餘里悉
心撫字增戶口至九千有奇墾田四萬餘畝晉官四川
叅政開瞿塘三峽古道民甚便之以忤劉瑾械繫赴詔
獄瑾誅復官浙江布政

吳文度字憲之江寧人少與兄文威力學登成化壬辰
進士累官南戶部尙書有政聲

吳秦江浦人成化壬辰進士授松陽知縣陞南京浙江
道御史復補河南道上書伸王恕冤疏論內閣尹直及

太監錢能朝論快之累官廣東右布政使

茅欽字家堯溧水人成化間由進士授行人尋擢御史疏劾閹宦用事者上勿之譴常使塞上有威名又上書論邊事甚悉尋遷廷尉攝大司寇事刑獄稱平著有鈍翁集

范祺字應禎溧水人由進士官福建僉事有清操執法無少貸正德間劉瑾柄政致仕歸

李昊字致遠金陵人成化間進士任南禮科給事中因黑青之異力陳時事尋晉官浙江左叅議值水災寬民逋負民甚便之

劉蒼字伯春廣洋衛籍官千戶通經史子麟字元瑞宏治丙辰進士臺諫龐津以劾外戚張氏驕橫下詔獄麟上疏申救累官工部尙書有清操

羅鳳字子文水軍右衛籍宏治丙辰進士性峭直官臺諫無少歆屈出守兗州時議有事太山欲加賦以備巡幸鳳不應被劾

姚隆字原學甯守後衛籍宏治壬戌進士初令浙江新昌晉主客司郎中出守荊州所至有惠政中官過郡從者殺人隆捕治抵罪中官恐以奇禍不爲變尋罷歸邵清字士廉江寧人由教諭授監察御史有直聲外戚

張延齡奏人負券若干緡有旨與追清置不爲理又以
事忤劉瑾罷歸瑾誅復官御史尋陞江西左江兵備副
使

嚴絃字仲周江浦人宏治壬戌進士擢陝西道御史疏
劾劉瑾守南昌極論宸濠非制晉九江兵備道從王守
仁討逆有功陞山西左布政

梁楹字汝直府軍衛籍歷官湖州通判遷荆府長史以
廉慎稱尋守睢州州舊苦水患江水出岷源至武陽遂
與邛水合其勢悍暴轉徙不常楹至築隄截大江之中
江勢少殺民賴以安

系作...
弓元字大方江浦人宏治丙辰進士授岳州司李陞山
東道御史巡按江西上修內攘外一疏幾萬言著有午
夢錄

凌雲翰字伯遠上元人宏治間進士知德化縣有惠政
邑有鬻妻養母者雲翰爲贖以歸而制產贍之

丁沂字宗魯溧水人宏治壬戌進士由南京刑部主事
歷郎中擢湖廣按察司僉事賑湖湘饑全活甚衆晉官
左都御史

鄭璫號騎右衛籍宏治己未進士出守南昌時宸濠蓄
異志璫每事裁抑之濠反因械繫之於小舟一日見鄰

舟有舊隸士卒諭以禍福乃得釋縛奪馬潰圍登岸一呼從者千人斬賊將范成等率衆投王守仁軍備陳賊勢烏合易破以功擢山東鹽運使子守矩中嘉靖壬子舉人任邵陽令有廉名

楊銳南京衛籍守備安慶宸濠之叛也兵過安慶將直取南京銳與知府張文錦固守且使軍士登埤辱詈之宸濠怒遂駐師攻城數日不能克贛撫王守仁乃得乘間入南昌議者以爲是役也銳之功大矣

王曄句容人由進士除吉安推官從王守仁平宸濠遷大理寺副爭大禮下獄廷杖事附明史王杲傳

馬汝僎字誠望錦衣衛籍性恬澹善書官慶元令歲值
攢造徭晝夜親閱踰月冊成吏不能爲姦撫院檄禦聞
賊李文標平之

金逵字達卿江寧人宏治間進士累官廣東按察使大
帽山賊爲患逵督力勦之擒其賊首林貴

李熙上元人任御史力陳駕帖之害正德間以災異復
陳十事有王宏者六合人亦任御史是時劉瑾秉政宏
與熙等上疏極諫乃悉逮治下詔獄事並附明史陸崑
傳宏後官至廣東副使擊走廣東徭寇著有已山集
何遵字孟循江寧人授工部主事正德間帝將南巡以

進香東嶽爲詞遵抗言淫祀無福又上疏乞罷南巡受杖死事詳明史本傳

梁材字大用南京金吾右衛籍叅政浙江時中官畢真將舉城應宸濠材刼持真使不得發中官麥福請盡徵牧馬草場租材疏論之爲戶部尙書力祛宿弊事詳明史本傳

李重字遠菴金吾後衛籍正德辛未進士授戶部主事累官江西按察副使清操峻潔初太監劉璟侵官銀二十萬欲厚有所餽以鉗其口重正色曰與其遺我孰若爲民償所負以足國乎璟憚其嚴乃盡以所侵輸官

管景字子山上元人授廣信府檢校監司聞其才檄署上饒適密民作亂景往宣布威德盜多散去乃擒治賊首餘黨悉平嘗修上元縣志應天府志

李傑字伯奇六合人正德丁丑進士授太常博士陞南刑部員外郎擢廣西按察使僉事值土酋參猛作亂王守仁爲總制委傑監督軍營往來給餉傑悉心任事客兵不敢縱

陸昌字希文六合人任山東臨朐縣縣遭蝗旱府議半災昌爲民力爭獲以全災上發粟賑濟設法捕蝗全活甚衆時方議開礦昌念民貧邑敝申請封完洞口禁戢

曠徒事竟已著有什一集

楊沔字柬之句容人正德己丑進士授南京大理寺左評事轉寺正晉知桂林府蠻荒俗陋乃遴俊秀立章程以訓迪之徭人羣聚爲盜沔諭以禍福立解散尋調補贛州府晉憲副備兵饒州致仕歸

景暘字伯時上元人正德間舉進士第二人除翰林性清介不阿尤篤孝義友人張貢見暘女欲與婚未聘貢尋卒暘曰曩吾已心許之忍負亾友乎卒召其子妻之王以旂字士招江寧人代陳銑爲三邊總督屢立戰功修延綏城堡築蘭州邊垣事詳明史本傳

劉璽字廷守龍鑲衛籍累官漕運上疏言漕政數十事著爲良規尋以忤當道致仕

何鉞字勳伯江寧人父瑄善天文鉞登正德辛丑進士由行人擢浙江道御史奉命清戎務閱軍器剔蝨殆盡出按兩浙吏治肅然以荊州知府致仕歸

厲堙字達之龍江右衛籍正德初授四川西充縣主簿署縣事請罷不急工費均徭練卒革鹽法水利獎端民甚安之

童時字用中上元人謁選太僕寺主簿宸濠之變武宗南征時獨署寺事綜理馬政軍用不乏晉官荊州府通

判

韓叔陽字進甫高淳人嘉靖丁未進士授浦江令厯戶部出守嚴州時礦徒作亂諸郡勦之殺傷甚多叔陽謂宜絕其餉道可不煩兵而罷遂分捕諸餉者適御史某弟與焉按之不少貸尋擢湖廣副使致仕歸

陳九齡字愛之高淳人事繼母以孝聞任宜春令抑豪右振貧乏省夫役革常例積穀數萬石以備賑性抗直不阿爲嫉者所中罷歸

陳九思字福之高淳人淳邑官田糧重鬻者僞作民田田去糧存積逋逃竄嘉靖戊戌請於當事虛米悉得蠲

除初令新鄉改令靈川皆有惠政

尹鳳字德輝南京人嘉靖中舉武科鄉會試第一歷官福建叅將倭陷福清南安連舩出海鳳邀擊沈其七舟大小十數戰內地賴以稍寧事附明史李錫傳

司馬泰字魯瞻江寧人嘉靖癸未進士授南道御史陞懷慶知府有惠政嘗勘魯府訐奏事不數日而決疏劾給事中陳洸太監崔文置有直聲

陳鳳字元舉太醫院籍嘉靖乙未進士授南陽推官決疑獄如神明尋擢陝西按察僉事聞邊警冒暑抵慶陽扶病經畫以勞苦卒

廖文光字士龍上元人父經任四川廣安同知有清名
文光中嘉靖丁酉舉人選清江令政尙廉明時嚴嵩執
政文光拘其橫僕於獄竟置之法尋以工部郎中致仕
歸

張鐸畱守衛籍嘉靖辛丑進士授監察御史巡按遼陽
請建沿邊諸臺堡又積粟六萬餘斛貯遼陽後遭大水
歲薦饑民被其澤

朱潤身字海峯江寧人嘉靖壬戌進士嚴嵩當國先期
以狀元餌之潤身拒不應遂抑置二甲并置館選由吏
部考功遷雲南僉事時土酋鳳繼祖作亂潤身募死士

指示方略遂擒治之

尹敏生上元人任御史疏劾嚴嵩居宅乃郭昫私人孫
淫所居淫既籍沒嵩弟應在籍中後官山東叅政事附
明史謝瑜傳

韓邦憲字子成高淳人嘉靖己未進士官衢州知府至
則陳明大義修職守實節省復成法議賦役講實政廣
儲畜修武備八事病劇值大旱猶强起書檄發粟賑民
著有韓衢州集

常信字國寶興武衛籍精六書官撫州府照磨時邑有
巨盜不獲監司以委信信詭爲日者服入賊巢因圖其

地形以歸遂禽治之

朱衣字正伯號杜邨錦衣衛籍選臨淄令遷守沅州會
礦徒作亂衣至下令執兵者賊徒手者民不得妄戮乃
禽治賊首餘黨解散沅有防兵爲變衣聞報曰此非反
也迫於饑耳急往撫之與之定期給餉而亂息子之蕃
見後文苑傳

劉煥字用晦六合人嘉靖丙辰武進士歷官指揮僉事
奉敕巡視南京屯田緝捕盜賊陞山西都司掌印尋分
守楊州晉官叅將嘗督戰姚家蕩親斬倭寇有奇功
柳江字朝宗高淳人任石城令調寧津平反馬省冤獄

全活甚衆省以數百金爲壽江峻拒之

張應亮字汝龍高淳人任餘杭令禦倭寇有功陞貴州道御史抵中貴於法出爲四川僉事尋謫鄱陽令晉嘉定知府又以忤當道罷歸

夏寧高淳人任邵武訓導會廣學宮有富室廬舍將毀賂寧求免寧峻拒之遷餘干教諭

史瑄字彥章江寧人守備靖州靖爲古槃瓠種恃險傑騫瑄往布威德遠近帖然

沈向字德一江寧人任巫山令流賊圍城向率衆堅守賊遂引去擢御史巡漕衛弁懾服

許彥忠字汝敬句容人嘉靖甲辰進士司理荊州尋補計部郎晉僉憲備兵睢陳左遷吳興郡丞尋復僉憲分守湖東所在有聲卒祀鄉賢祠

余光江寧人任廣東巡按御史嘉靖間議討安南光上疏請遣官責其修貢事附明史潘珍傳

沈越字中甫江寧人嘉靖壬辰進士歷官羅田平江知縣擢山東道御史巡撫江西執法峻整後忤嚴嵩罷歸許穀字仲貽一字石城上元人父陞字彥明清修雅尙穀舉嘉靖乙未會試第一是年帝御文華殿親試進士穀策論時事甚剴切爲讀卷者所抑授戶部主事累官

尙寶寺卿以清慎稱子天敘孫延祖延祖子岳並知名
盧璧字國貞金吾衛籍舉嘉靖戊戌進士性峭直辭色
不苟動遵禮法累官苑馬寺少卿

張祥字元吉錦衣衛籍嘉靖間舉進士居官廉介自持
催抑豪右撫字流民以苑馬寺卿罷歸

阮厚字德載京衛籍嘉靖二十年進士授浮梁令入爲
南職方大璫夏綬盜伐孝陵樹當誅厚按坐如律綬以
重貲求免峻拒之厚風骨挺然卒以忤當道罷歸

蔡銳字抑之畱守衛籍以孝聞性端介不苟中嘉靖丙
午鄉試選河南通許令有政聲改杭州府學教授士憚

其嚴明後以襄府紀善終

鄭宣化字行義龍江衛籍嘉靖乙丑進士推袁州府推官入爲南工部主事除兵部武選司郎中忤權要外調邵武守有惠聲

金光初字元子江寧人官奉新令鋤姦折獄咸當其事人稱神明焉

顧昊字欽甫號石坡江浦人嘉靖間任浙江嘉興縣有平倭功攝雲南知府事政聲丕著著有詩易詳解挹青詩集

張傑字世興高淳人性狷介嘉靖間以薦授汝藩審理

蒞任十年卒貧不能殮同官醵金治其喪

張蘊字一貞高淳人嘉靖間進士授南戶部主事出守懷慶均科額辨冤抑政聲大著擢山西副使備兵雁門時俺酋外躡蘊至繕修城隍簡核軍實寇不敢犯

韓孜字勉之高淳人嘉靖間任鄖陽同知鄖守卒虧帑金五十兩孜代償之且隱其事尋擢南戶部員外歷官刑部郎中

邢繼本字惟立高淳人任衛輝府推官獄係盜趙會等七人皆姦吏所羅繼本廉得其情惟以會抵罪餘皆釋免有幼男女姦獄久不決繼本閱爰書嘆曰十歲男

女是相戲耳立昭雪之邑有盜殺七歲女於路繼本焚香籲天捕趙姓者治之一訊而服會邑旱民饑繼本設糜賑民全活甚衆尋擢知府卒於官

蔡屏周字二白江寧人任浮梁令時浙江爲魏瑞建祠監司檄至浮梁屏周毀裂其文幾及於禍尋晉官開封府通判勦寇有功

路伯鏜字東溟上元人嘉靖辛丑進士觀政刑部時郭勛進方士段朝用術敗論死勛亦係獄懼并誅其家以千金爲賄鏜峻拒之子九同任通山令值歲荒甫下車卽借庫金糴穀賑濟全活甚衆

明守仁句容人嘉靖間勦倭寇有功官福建總兵右軍都督僉事世襲指揮

吳自新字伯恒江寧人隆慶戊辰進士累官南刑部侍郎性諳機宜尤精法律子汝琦汝璟皆知名

王敬民句容人隆慶辛未進士授山東東昌府推官調大名府推官召爲工部給事中奉使朝鮮餽遺一無所受晉太常大理兩寺少卿尋奉命提督南贛汀韶等處軍務巡撫嶺海間終三年無竊發之警尋致仕歸

李喬字世臣號玉峯句容人文定公春芳之曾孫也初任中州靈寶令邑旱比歲告祲喬竭誠祈禱歲以大稔

擢祠部郎尋奉詔提督東省學政轉中州按察使陞秦
中布政使秦寇方張喬以一人理餉軍無餽乏晉官秦
撫時寇氛甚惡喬率標下僅千人督衆禦寇斬首三千
餘級未幾以父喪歸遂不起

武尙耕字晴川溧水人隆慶辛未進士性清介官四川
叅政平洞蠻之亂勒功峨嶓山石晉官湖廣左右布政
樊繼字景昭句容人累官湖廣興國知州毀淫祠崇正
訓嘗築隄障水郡人謂之樊公隄

笄繼良字赤如句容人講學東林舉於鄉筮仕鵞湖尋
知絳州以不禮崔呈秀爲所銜魏璫用事遂以門戶被

削奪璫敗復起出守汀州州有山賊鍾凌秀爲亂繼良
綜理嚴密賊衆引去陞山西平陽道尋致仕歸

程國祥字仲若上元人官至戶部尙書時議增餉國祥
多方區畫亦時有所蠲減事詳明史本傳

何湛之龍厓人京衛籍萬厯乙丑進士歷官浙江叅政
弟淳之丙戌進士司李中州皆有雋才

黃尙質字宗商水軍左衛籍由劔州學正改陝西令初
攝巴縣會蔡百貫作亂尙質竭力捍禦郡賴以安以饒
州別駕致仕歸子應登字徵甫一字少龍厯官廣西府
教授性廉潔有文名

顧國輔字惟德金吾衛籍萬歷甲戌進士由刑部郎中
出守襄陽張居正當國國輔獻囚有所矜釋居正不允
乃抱牘而質於居正卒行其意子起元見後文苑傳
韓仲雍高淳人萬歷甲辰進士累官福州副使巡海道
時日本島酋納款議者謂宜誅之雍曰殺降不祥乃椎
牛醢酒以饗之會東沙外洋有倭船至雍命酋帥明石
道友往爲之間生擒六十人獻俘軍門尋爲忌者所中
罷歸

上有徵字虬巖江寧人中萬歷間鄉試授山東昌邑令
時水旱薦臻流民載道有徵首先捐賑全活甚衆

卜履吉字訥齋江寧人萬歷戊戌進士歷官福建兵備副使稅監開礦將毀民廬基履吉具疏以聞先禁黨惡璫蝕稍衰又捐金助其礦稅使之出境聞地以安

薛應和字子融江寧人性方介好施與官長洲教諭遷成安令故事催徵多取羨於民應和悉罷之有崔守志者微加羨以進應和追給民而寘志於法將入覲所取士張嶙先於所往盛裝橐以餽應和峻拒不受

厲昌謨字從訓六合人萬歷壬辰進士選宜黃令平反冤抑尋遷新喻邑素多盜積數令不能制昌謨弭戢有方盜不敢入其境擢車駕司主事乃條上方略數端奉

命按部二十四衛汰老弱責虛冒不避權貴以佐戎政
尋轉武庫奉命餉邊大同盡革羨餘之入

孫思孝字奉先高淳人以孝聞萬歷中任合州同知革
額外科米均運艘之夫役出株連重辟五人尋致仕歸
著有旅中草宦遊草

魏成忠字蓋卿高淳人萬歷戊戌進士授餘干令邑宦
欲移徭役悉委於小民忠力爭於監司乃不果行尋擢
兵部武庫歷職方員外晉官廣東瓊州道有妖人金陽
子辟穀惑民交通黎峒將爲亂忠遣壯士誘縛之海外
以安陞山西按察使尋被劾歸

邢振羽字翔之高淳人任海陽令擢知華州渭南令索
諸富者賄弗得囑盜誣之監司令振羽復讞乃悉釋去
吏以涉嫌難之振羽曰吾豈避嫌殺人竟以牘上尋擢
戶部員外轉郎中執親之喪哀毀盡禮廬於墓側以老
卒祀忠孝祠

吳學夔字章甫高淳人任漢中府推官掌茶馬部舊例
羨餘歲萬金夔曰國家此何等時官猶私此悉舉助邊
嘗杖斃姦充茶商一人吏不敢爲姦尋改鎮遠司李遷
遼州守以勞勩卒於官

楊公翰字具臣溧水人萬歷甲辰進士任漳州太守漳

地濱海俗悍戾多訟公翰一以清靜爲理尋分守湖東副憲歷興泉道江西觀察使入覲力陳民間疾苦上深嘉之尋致仕歸

孔聞勅字典甫一字敦五句容人任蜀郡鄰水簿署縣事邑有滯獄株連者衆以沒帑金未獲賊聞勅廉得其人謂之曰若無恐第言金所在吾能生汝其人驚懼吐實勅卒爲請於長吏貸其死淹係得釋尋致仕歸卒祀鄉賢祠

王祚遠字無近句容人萬歷癸丑進士授翰林院檢討起居注纂修實錄典試得士如孔文忠姚希孟周鳳翔

諸人歷翰林院侍讀學士充日講官多所啟沃晉禮部
右侍郎改吏部左侍郎以病告歸

武化中字大治溧水人以萬歷己酉舉人授黃陂令邑
多豪強化中逮治其尤餘皆懾服尋擢南道御史

姚汝循字敘卿錦衣衛籍歷官政多平恕知嘉定州以
事忤張居正罷歸孫世昌字克修鄉里稱善士焉

焦瑞字伯賢旗手衛籍以貢授靈山令首罷里甲之供
時邑多盜撫檄推官劉某勦之被執瑞率衆往援賊皆
羅拜瑞諭以威德賊遽歛去尋嚴嵩當國賦歛屢急瑞
乃移疾告歸

張後甲字丁也鷹揚衛籍萬厯庚辰進士授辰州推官
有姦民手斃其女誣人陷大辟後甲至力爲昭雪晉官
戶部督御馬草場盡除積弊中貴憚之擢四川按察使
致仕歸

姚履素字允初上元人萬厯辛丑進士授御史恤刑湖
廣全活甚衆陞廣東按察司副使督學政致仕歸

俞彥字仲茅上元人萬厯辛丑進士授兵部車駕司累
官光祿寺少卿彥長材玩世於事明斷無所畱滯而性
高兀屢忤當事焉

王之藩字南衡江寧人兄某領官鑑采銅於荆襄畱滯

新修志卷之三
三
齡年耗其資株連者衆藩毅然鬻產以輸官筮仕陝西
攝華州篆平反訟獄出贖鍰釋淹係者數人

陳應元字祐伯江浦人萬歷癸丑進士爲人深沈練達
初由工部主事擢山東布政使司陞登萊巡撫崇正間
流寇肆虐上疏請增兵防守江北尋晉官工部尙書致
仕

張應圖號鍾河高淳人萬歷間任政和令邑故無城素
懼倭患應圖下車卽請建城後倭至民得無虞尋擢知
睢州致仕歸

張應望字汝尙號凝益高淳人萬歷壬辰進士授烏程

令時祭酒范應期僕橫於一邑應望捕執渠惡將寘於法應期懼奏聞遂自縊妻吳氏伏闕誣奏遂逮望下詔獄坐戍民咸寃之熹宗朝以給事中段然奏贈尙寶寺卿

黃秉石字復子號耿山高淳人萬歷間謁選授順德司李平反寃獄陞嚴州丞攝建德縣事積弊一清尋補南雄貳守遷福藩長史致仕歸

陳萬善字可一高淳人萬歷庚戌進士授京華令捐修學宮却羨餘金尋擢庫部郎值京師戒嚴朝議大臣元勳守禁門而本兵皆屬萬善當東直門靖共如職尋遷

駕部郎是時逆璫愈熾萬善遂移疾歸

王守素字德履溧水人萬歷庚辰進士授杭州推官平反疑獄有聲累官光祿寺卿

李在公字天培上元人萬歷丙辰武進士累官分甯所至有聲流賊猖獗總鎮陳洪範獲賊男婦四百餘人將皆斬之在公請驗其僞乃斬二十二人以徇畱守夏雲奇遇在公厚雲奇以忤璫被逮其子袞爲賣菜傭在公之子敬爲之授室置產人咸義之頻歲饑饉在公屢捐貲賑濟全活者不下數萬人

孔貞時字中甫句容人萬歷癸丑進士授翰林院檢討

起居注尋知制誥條上足兵足餉數事與弟貞運編纂
六曹章奏無媿良史未幾卒於官祀鄉賢祠

武堯中字熙唐溧水人任竹谿知縣會徵遼餉甚急嘆
曰正供且難況額外之供乎卽日解組歸里

武位中號國寶溧水人任兗州武城令民有寇不窺城
蝗不入境雹不侵疆水不爲患之頌

曹可明字懋德句容人天啟壬戌進士分臬粵西擒盜
首數人賊衆醢金求爲營脫卒按如法

孔夢周號伯海句容人官陽城縣尉邑有豪強爲盜窟
宅令莫能治周密令間諜傭作盜家蹟其爲盜之人朱

其衣以識之遂得擒治無餘

陳調鼎字汝玉高淳人天啟壬戌進士授戶部主事尋督薊州糧儲常俸之外羨餘悉充軍餉且賑民饑寒時魏閹方熾鼎獨耿介不阿閹敗出爲金衢兵備道坐事被逮卒於京

胡有英字穎生高淳人任潮州平遠令邑民多嘯聚爲姦素稱難治英往察疾苦禁姦邪扶良善民皆棄兵弩而樂田畝翕然向化尋調舞陽令上官具疏議遷汝南道英以時事不可爲遂致仕歸

趙之驛字孟良溧水人天啟乙丑進士知德化縣修學

校以興士築隄閘以利民累官南議部郎

王承印字貴愚江寧人世襲百戶掌龍江左衛印綜理屯政馭下有法又有鄭印者由世襲指揮累官總兵掛征蠻將軍印以好學聞印之子夢熊字虛白由進士累官叅將能騎雙馬當並轡馳驟時踴身而過仍發矢中的稱一時邊將之冠

陸朝字闇先上元人天啟辛未進士性狷介嘗盛夏猶衣縐袍有以葛贈者婉却之時朝議以浙漕阻滯擢朗戶科給事中董其事至浙量舉州縣守令之賢者協治之飛輓以濟

楊森字季玉句容人以貢士特授河南真陽令會有土寇數百人焚劫南關森單騎率僕從禦之賊衆望風奔潰諸生寇平爲讎所陷時流氛正熾監司峻法誅求邑令莫敢白其寃森至廉得其情立爲詳憲釋免總兵左良玉奉命勦寇統兵數萬過真陽老弱驚懼竄伏山谷森往謁爲民請命兵卒無譁民得安堵尋以疾告歸倪篤之以字行一字樸菴江寧人天啟壬戌進士官戶曹時議裁驛站篤之執奏不可謂游手强悍之徒不肖爲兵而又不卽爲盜者皆賴驛站以存活今若裁之彼無所歸則是腹心之患也不從未幾闖獻禍作時議又

請加兵餉篤之曰國家之患不在兵少而在餉多餉多則農病農病則民貧民貧則挺而走險者益衆不若減餉裕民以消盜源之爲得也由是忤執政坐他事繫獄七年尋復官戶科給事中後爲僧

孫拱辰字子極六合人官撫州推官移守臨清時稅璫甚熾又惑方士言殘嬰兒爲藥餌辰獨揭治其罪尋忤當事罷歸

邢士際號警我高淳人官戶部員外郎奉詔往賑豫章饑民捐貲巨萬以助事間優詔獎之

施一鰲字士選溧水人任沔陽學正署州事詰戎賦有

聲邑田一萬三千餘畝當襄水之衝民無計抵塞一鰲爲沈舟百隻聚土築隄三月功成皆成沃壤尋知安陸縣以病告歸

林時敏字止鄉江寧人任光祿寺丞魏璫柄政移疾歸崇正中流寇發難范景文爲南兵部尙書時敬上固本守江勵兵裕餉二策深見嘉納

錢源字伯開金陵人崇正丁丑進士任東陽令時浙東大饑東陽與天臺接壤邑有富人積儲待價民往謀得升斗卽時解散後人有謀復舉者富人置馱酒中饑民飲而倒者數十人天臺令遽以民亂報源曰此皆無告

之窮民耳據實申請獲免大獄

孔貞運句容人萬歷己未進士授編修崇正間畿輔被兵條上禦敵城守應援數策尋引歸莊烈哀詔至貞運哭臨慟絕不能起遂卒事附明史張至發傳

余大成江寧人嘗奏發太監劉一璟私書又以事忤魏忠賢有清執名巡撫山東孔有德反大成定議主撫尋有德陷登州遂削籍事附徐從治傳

湯有光字孟弼溧水人官瑞州知府爲政以撫字爲先不事苛察嘗曰吾奉命出守爲民非爲官也朔望必至學宮延見諸生講說經義焉

葛奇祚字子長高淳人崇正庚辰會魁授兵部武選司主事歷員外郎陞四川兵巡道時流寇犯境奇祚督兵戰卻之擒斬其賊首羅坤全蜀獲安竟以勞成疾卒於官奇祚恨時事艱危羣寇未殄將屬續猶力書守禦數事上之

李昌裘字治公高淳人授崇明訓導崇明地濱海民多不軌昌裘嘗遇寇謂之曰我一青氈汝輩何慕因又諭之曰急歸正作良民吾當保汝無辜於是羣寇相繼就撫尋以武緣令致仕歸著有遠菴草及性悅篇

凌世韶字宮球江寧人崇正甲戌進士官福清知縣不

事催科坐謫汀州經歷署寧化縣邊民操土音不可解
前此民以納課至者吏皆誣爲盜而奪其所有詔至痛
懲其弊積逋一清遷處州推官甲申後棄家爲僧未幾
卒

王芝瑞字鍾淑京衛籍崇正辛未進士授行人轉禮部
郎性狷介時荆溪再相欲以芝瑞補銓部芝瑞辭之甚
力尋擢四川提學副使

韓一光字季孚高淳人崇正戊辰進士擢江南道御史
豪貴戒不敢犯巡按四川清釐積讞全活甚衆以執法
忤權貴外轉浙江僉事累官山東副使致仕歸故事淳

邑錢糧官徵民解一光爲請於當事免其輸將之苦
常延齡字喬若開平王遇春之十四世孫也襲封後條
陳利弊疏凡十二上皆切時事科臣姜埰行人熊應霖
以劾首輔下獄延齡疏請釋免馬阮擅政延齡復露章
糾劾忤權臣意卽掛冠去爲僧

王薇字垣夫高淳人任河南溫縣令值歲大祲薇多方
存活之流寇充斥薇擒斬賊首王芊等有奇功鼎革後
遂不復仕